

Leipzig, 8. Oktober 1571

Von Joachim Camerarius d. Ä.

Druck: Camerarius, Epistolae S. 492f.

S. D. Occasionem, quae offerebatur, mittendi litteras ad te, non volui negligere, petente praesertim hanc operam nostram, eo qui istas reddendas tibi accepit. Est ille popularis Fabriciorum, qui sunt, quemadmodum te nouisse arbitror, Chemnicenses, idquē potuit cognosci de nomine patrio in suis opusculis ferè ascripto familiae à Georgio nostro, qui superioribus mensibus ex hac vita migrauit, cum omnium bonarum artium studiosorum dolore, et damno exercitationum. Atque sunt edita quaedam de eo casu, quae, si fortè legere velles, implicui his litteris. Huius igitur ciuis petijt à me, vt aliquid litterarum sibi traderem tibi afferendum: ita enim fore aditum suum tibi gratiorem, se sperare aiebat. Commendari quoque se tibi cupiebat. Sed ego ei dixi, tibi omnes esse vltro commendatos, qui honesta et recta studia colant: mihiqüe esse persuasum, nulla in parte defuturam ei operam tuam, qua quidem dari illa possit. Idquē esse ipsum experturum non dubito. De his igitur hactenus. Tuum Demosthenem, de quo aliquando mihi scripsisti, nostri bibliopolae nondum attulerunt. Mei etiam filij collectas explicationes Ethicorum Nicomacheorum nostras ante biennium Basileam miserunt, vbi adhuc haerent, nisi fortè, sicut Chronologia nostra, interciderunt. Si essent ἐριστικὰ καὶ διασυρτικὰ scripta, facile et celeriter reperirent expressorem. Sed malo prorsus supprimi mea, quām in isto genere eminere. Verūm haec alieniora sunt. Et ego iam quasi exoriens de tentatione morbi sanè graui, non eram ad scribendum magnopere idoneus. Valebis igitur, et nos, quod facis, amabis. Vale. Lips[iae]. D[ie] 8. M[ensis] VIIIbris. Anno 1571.